

Himno y Bandera

Compositor y Musico Arubano Rufo Wever

*pionero di Musica y Cultura
Arubano co compositor Aruba
Dushi Tera 1917-1977*

En connexion cu nos dia nacional nos ta recorda cu na aña 1952 Rufo Wever hunto cu su gran amigo musico y compositor Padu Lampe a compone e himno nacional na Aruba.

E tempo ey e idea a nase como no ta tin un cantica na Papiamentu cu por a usa durante aubadenan y otro dianan importante pa Aruba. Tabata tin un cantica na hulandes cu tabata wordu usa hopi, cu tabata un vertaling un di cancion existente di Hulanda y cu palabranana adapta pa Aruba.

Asina a nase e cantica Aruba Dushi Tera cu despues a wordu declara himno di Aruba.

Minibiografia di e compositor

Rufo Wever.

Dia ocho di December 1917, Rufo a nace na Wilhelminastraat 33, Oranjestad, Aruba, e primogenito di e matrimonio di Shon Leonila Maria Annette Lampe Babijn y Civiles Marcial Wever Everts.

E pareha tabata bin di famianan acomoda y Civiles tabata un contratista, constructor di edificacion, di barconan y ebanista.

Don Civiles tabata tin un mente technico pero tambe tabata gusta musica y tabata toca clarinet y cuarta.

Net prome cu Rufo a cumpli 6 aña, Rufo a haña un simfonia di boca regalo y den un par di dia ela sorprende su famia cu e por a toca un cantica cu tabata na moda su mes y sin ningun ayudo.



Rufo su tata a keda masha impresionado y entusiasmo y mesora a compra un piano y a contrata e conocido maestra di musica di Corsow, Shon Shishi Rodriguez Timmer pa Rufo. Sra.

Rodriguez a cuminsa siña Rufo e conocimentonan di musica en general. Manera cu Rufo a haña e piano e mes tabata practica ariba dje.

Tempo cu Rufo ta tin apenas

10 aña su tata a fallece arrepentinamente y a laga Rufo y su tres otro rumanan huerfano. Su mama Shon Annette, un dama di karakter fuerte y semper cu un conducta correcto a sigui

DIARANZON 17 MAART 2004

DIARIO

PAGINA 7

Himno y Bandera

e lucha pa hiba su famia padilanti. Aki ela haña e sosten financiero di su famia.

Tempo cu Rufo ta tin 12 aña ya e por a toca piano na un manera admirable. Tambe ela sinja su mes saxofon, guitarra, cuarta, clarinet y otro instrumentonan ritmico. Tempo cu Rufo ta tin 15 aña ela lanta e orkesta musical "Melody Band" hunto cu su amigonan: Tom Lampe (violin), Wewe Croes (violin), Twai Croes (trompet), Clemente Lacle (drum), y Rufo na piano. Despues tambe a join e grupo Padu Lampe, primo segundo di Rufo, y aki a cuminsa nan amistad.

Nan 1935, inspira door di e famoso compositor y cantante Argentino Carlos Gardel cu a bishita Aruba e aña ei, y cu Rufo a hanja un oportunidad pa actua hunto cu ne, Rufo a lanta su grupo di tango "Los Trovadores Tropicales" hunto cu su amigonan Clemente Lacle (cantante) y guitaristanan: Harold Hoppmans, Carlos Booi, Jan Croes y Shemmi Coronel. E conjunto aki

tabata e prome conjunto musical di Aruba cu a toca na un radio na Corsow, radio Curom.

INICIO COMO COMPOSITOR

Aña 1935 tabata un aña di hopi significacion pa historia musical, Rufo a compone na edad di 18 aña, su prome wals "Arubanita" y e composicion aki a cuminsa e era di composicionnan Arubano moderno. E composicion aki a bira asina conoci y gusta cu te awe despues di 67 aña di su composicion e ta sigui ta un di e composicionnan mas toca den historia musical di Aruba. Ela wordo toca y graba pa un variedad di artistanan y cu hopi frecuencia por tende na radio y television. E tabata e prome wals, Arubano y Antiyano, cu un miembro di Cas Real, Reina Juliana, a balia riba dje.

E composicion di "Arubanita" tin su significacion historico y cultural pa Aruba, pasobra e ta e prome composicion cu su autor ta conoci y cu te ainda ta wordu graba y toca.

Despues di su prome composicion a sigui un sin fin di composicionnan refina y cu un sabor pikante. Entre otro e famosos wals di tres parti "Encantadora", su segundo wals, e wals complejo "Annette" den tres parti dedica na su mama. E wals "Aruba", bunita y elegante e ta representa e gran dignidad di e pueblo di Aruba. E wals "Antillenhuis" ela dedica na e minister Arubano y su gran amigo Wim F.M. Lampe.

Rufo su amor pa su isla ta obvio ora ripara cuanto biahela ela usa e nomber Aruba: wals "Arubanita", wals "Aruba", himno "Aruba dushi Tera", tumba "Aruba tieria bunita", "mambo di Aruba", wals "Mi Aruba Stima".

Tambe tabatin algun composicion cu su gran amigo y colega Padu Lampe: E tumba "Chanita" cu letra di Hubert Booi, e inmortal calypso "Carnaval" di aña 1954 cu a bira famoso cu e cantante Edwin Zichem y naturalmente e himno nacional di Aruba "Aruba Dushi Tera" composita na 1952 y graba pa prome bes den version di orkesta na Venezuela pa e orkesta di Don Anibal Abreu.

UN DON

MUSICAL

Compone tabata facil pa Rufo y a sigui un total di mas of menos 400 composicion. Di esaki mas of menos 100 ta composicionnan completo pa piano of orkesta y 300 ta composicionnan y arreglo pa cahi orgel.

Hopi di e composicionnan pa cahi orgel Rufo a usa e number artistico A.N. Tillano.

Rufo su composicionnan ta inclui: wals, tumba, bolero, zamba, mambo, porro, merengue, danza, mazurka, polka y calypso. Mencia ta di importancia pa menciona cu ademas di compositor, Rufo tabata arreglista y tur e arreglonan e tabata hasi su mes.

Semper Rufo tabatin un of otro melodia den su cabez, pesei tabata wordu existi di e muchanan di famia pa no hasi ningun ruido, pasobra esaki por causa cu Rufo ta perde e melodia di e composicion cu e tabata bezig cu ne.

Den un entrevista sostiene cu Rufo na 1968 ariba e pregunta cu di tur su composicionnan cual ta su favorito, e contesta tabata rapido: e wals "Encantadora".

Na edad di 21 aña Rufo a cuminsa cu e trabou di cahi

orgel. Aruba conoce awe mas of menos 106 aña di musica di cahi orgel, pero Rufo tabata e prome persona cu a cuminsa traha e cilinderman pa e cahi orgel na Aruba y ela hasi esaki pa 33 aña. Anteriormente e cilinderman tabata bai Corsow. E hecho aki tambe ta duna Rufo Wever un lugar especial den historia di musica folklórico di Aruba.

Na 1941 den un accidente fatal Rufo a perde su biza robez, apesar di e tragedia aki den su bida ela supera esaki y ela keda compone y toca piano cu un biza artificial cu e mes a diseña y cu a wordu traha pe na Alemania. Dia 30 di December 1977, apesar cu Rufo su salud a bai atras, toch ela fayece inespera di un pulmonia.

Aruba y Antiyas a perde un di su musiconan di mas grandi, e pionero di e musica y cultura moderno di Aruba.

Pa estudiantenan y interesadonan di musica y musiconan di Antillas por mira e bunita website cu tin informacion na hulandes di e compositornan Arubano Padu Lampe y Rufo Wever books.caribseek.com bou di "Muziek en Musici van de Nederlandse Antillen".